

Date – 04/05/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Union Textiles Minister Pu Giriraj Singh chuan Muga silk chu Mizorama a tam thu sawiin, Mizoram chu ‘Golden State’ tih hiala koh a duh tih a sawi
2. Kum hnih chhunga Mizorama thar sawhthing man san ber lai a thleng mek a, hmun thenkhatah kg. 1 cheng 59 leh duli -a lei tur te pawh an awm.
3. Vawiina Assembly vote chhiarah BJP chuan West Bengal-ah a wawi khat nan sawrkar an siam dawn
4. Keralamah Congress kaihhruai United Democratic Front (UDF) leh Assamah BJP an sawrkar dawn bawk a ni.

<><><>

UNION MINISTER

Zan khat riaka Mizoram tlawha lo zin Union Textiles Minister Pu Giriraj Singh chuan vawiin khan Mizoram Handloom and Handicrafts Development Corporation Limited (ZOHANDCO) Office a tlawh a. Sericulture Minister Pu Lalthansanga’n a tawiawm a ni.

Union Textiles Minister pual hian ZOHANDCO hian exhibition an buatsaih a, Mizo puantah hrang hrang te leh thiamhnangdeh lam hawi an siam chhuah, an pholan te chu a hmunah a en a. Puantahtute leh sumdawngte nen inkawmhona hun tawi an buatsaih bawk.

Union Textiles Minister Pu Giriraj Singh chuan Silk vang leh tha bika an sawi - Muga silk chu Mizorama a tam thu sawiin, Mizoram chu ‘Golden State’ tih hiala koh a duh tih a sawi a. Kum 2035 ah chuan silk metric ton 1000 aia tam an dehchhuah theih ngei a beisei thu leh Central sawrkar chuan kuthnathawktute hmasawn zelna atan sum pek chhuah an ui loh thu a sawi. Union Minister chuan hmeichhiate chawikan pawimawhzia sawiin Lakhpati Didi scheme chu tangkai zawka hmang turin puantahtu nuho a chah a; he scheme hnuaiah hian tun dinhmunah cheng nuai 5 thleng pek theih niin, nuai 10 thlenga dawn theih tura siam an tum thu a sawi bawk.

Union Textiles Minister Pu Giriraj Singh chuan Sawrkar Laipui Textiles Ministry atangin officer pawimawh tawiawmtu engemawzat a hruai a. Heng a team rawn hruaite hi zin satliah tur ni loin, Mizorama Sericulture Department than zel na

tur te, farmer te hmasawna tur leh Mizoram mipuite thatna ngaihtuah tura lo kal an nih thu a sawi a ni.

Pu Giriraj Singh –a hian SAMARTH Training Certificate leh E-Pehchan Card a sem a. Hei bakah hian Yarn Pass book leh Artisan ID Card semchhuah niin, Certificate of Appreciation of Workshed, Frame Loom & Lighting unit chu Pi Lalramthangi hnenah hlan a ni.

<><><>

FAINA PUITU APPP

PHE Department in an siam Faina Puitu mobile application chu vawiin khan PHE Minister Prof. Lalnilawman a tlangzarh.

Minister chuan bawhlawh hi tangkai taka hman theih dan a awm a, zir bing mite chuan waste to wealth tiin an sawi bawk a ti. Supreme Court thuchhuah siam, Solid Waste Management Rules, 2026 dik taka hman a nih theih nan, Aizawl pawnah chuan VC-te nen bawhlawh sawngbawl lamah hma lak an tum thu a sawi a, chung atan chuan he application hi a tangkai a rin thu a sawi bawk.

He application hman hian mahni sanitation point a bawhlawh paih motor thlen chin hriat theihna te, bawhlawh paih tur bik hriat theihna te, lungawi lohna thlenna te, mahni in atanga bawhlawh paih theihna te (Door to Door Pickup) a awm a. Bawhlawh re-cycle theih hralhna (Garbage Store) te, bawhlawh paih kawnga dan siam chhiar theihna te leh mipui tana hriattur pawimawh en theihna te pawh he application ah hian a awm bawk. FAINA PUITU hi Android leh Mac ah download theih niin, kumin chungh atan man chawi loa hman theih niin, nakum atangin thla tin cheng 10 chawi a ngai tawh dawn a ni. Tunah hian Aibawk RD Blockah hman a ni tawh a, Aizawl Municipality huam chungah erawh hman a la ni lo.

Tlangzarh inkhawm hi PHED Engineer-in-Chief Zodintharin a kaihrui a ni.

<><><>

MUHCS

Mizoram State Healthcare Society (MSHCS) Chief Executive Officer Dr Lalhriatzuali Ralte chuan hriattirna tichhuakin, Mizoram Universal Healthcare Scheme (MUHCS) empannelled hospital ni loah damlo admit theih a nih thu leh damlo admit turte chu nunna chhan nana enkawl nghal ngai -emergency bik chauh a nih thu a tarlang.

Dr Lalhriatzuali Ralte chuan, kumin April ni 1 atanga kalpui tan MUHCS 2.0-ah empannelled hospital ni lo te'n MUHCS hmangtu damlo an enkawl theihthe chu - ICU-a dah nghal ngai damlo-te, nunna chhan nana zai nghal ngai leh accident tâwk nunna chhan nghal ngai te an nih thu a tarlang a ni.

((VOICE CAST - Healthcare society-in an tarlan danin tun dinhmunah Mizoramah empannelled private hospital 16 a awm mek a; chu'ngte chu Aizawl district-ah JC Eye Hospital, Chaltlang leh Ramhlun North-a Nazareth Hospital, Redeem Hospital, Synod Hospital, BN Hospital & Research Centre leh Eye Care Hospital-te an ni. Champhai district-ah DM Hospital leh MED-AIM Hospital te, Lawngtlai district-ah Christian Hospital leh Lairam Christian Medical Centre te,

Lunglei district-ah Christian Hospital, Faith Hospital leh John Williams Hospital te, Serchhip district-ah Mercy Hospital leh Siaha district-ah Maraland Gospel Centenary Hospital-te an ni.))

Puan tawh angin MUHCS 2.0-ah hian MUHCS kalpuitu damdawi-inte hnenah damlo in enkawlina senso rulh nan kum 2026-27 atan sorkar kum intan thla, April thla khan sorkarin cheng nuai 700 vel a pechhuak a, hei hi damlo 2,615 enkawlina senso a ni. MUHCS 2.0-ah hian pawisa senga inziaklut chhungkua 37,851 awm tawhin, nikuma inziaklut chhungkua 20,213 aain kumina inziaklut tawh zat hi chhungkaw 17,638-in an tam tawh a; inziahlul theih hun hi tun thla ni 15 thleng hawn niin, online hmangin muhcs.mizoram.gov.in ah inziahlul theih a ni. Sorkar hnathawkte, pensioner-te leh golden card neite chu inziahlul a ngai ve lo.

<><><>

GINGER

Kum hnih chhunga Mizorama thar sawhthing man san ber lai a thleng mek a, vawiin khan Mualkawi Secondary Collection Centre-ah sumdawngten sawhthing kg. 1 cheng 59 leh duli -a lei turin auction an chhang a, SCC dangah pawh cheng 50 chunglama auction chhanna engemaw zat a awm.

Vawiin vek khan sorkarin rapchung tehcnology leh tapchhak technology hmingsua sawhthing tih rona khawl society-te hnena pek chhuah tura a siam chu enchhina trial run neih a ni.

Sorkarin SCC kaltlanga kuthnathawktute sawhthing hralh hun tura a bituk chu tun thla ni 30 thleng a ni a; Akashvani News, Aizawl zawhna chhangin Mizoram Agriculture Marketing Board (MAMB) hotute chuan, vawiin khan SCC hrang hrangah sawhthing auction niin, a chhang sang berin Mualkawi SCC-ah kg 1 cheng 59 leh duli-in an chhang a; hriat theih chinah East Lungdar SCC, Rabung SCC, Khawzawl SCC, Hrangchalkawn SCC leh Lungtan SCC-ahte pawh kg 1 cheng 51-55 inkara lei turin sumdawngten auction an chhang a ni.

Nikum khan sawhthing hi a rate a san lai berin cheng 30 a nih thu MAMB hotute chuan an sawi a; kuminah sawhthing hralh a nih tan tirh khan cheng 40-45 inkar ni turin sorkarin bituk mah se, lei ngam an awm lo a, tun dinhmunah erawh chuan kg khat cheng 50 aia sanga lei nngam sumdawng engemaw zat an awm a, kum 2 chhunga sawhthing man a san ber lai a thleng mek tih an sawi.

MAMB hotute chuan sorkarin rapchung tehcnology leh tapchhak technology hmanga sawhthing zailep tihrona khawl a siamtir chu vawiin khan Sairanga Sawhthing sawngbawlina hmunah enchhinna (trial run) neih a nih thu an sawi a; khawl hi 60-70 vel lei a ni dawn a, society-te hnenah tlâwm tēin sorkarin a pe ang, an ti a; sawngbawlina khawlte a taka hman tura peihfel a nih chuan loh theih loha hralh tura sumdawngte hnena thlai thar nawr liam ngai thin chu a bo theih tawh an beisei thu an sawi.

<><><>

KHAWZAWL TB AWARENESS

Central TB Division in TB 100 Days Campaign Second Phase a kalpui mekah Champhai District TB Centre Staff te chuan tunlai hian Khawzawl khawchhungah Awareness leh X-Ray Screening an kalpui a, vawiin pawh khan Zaingen YMA Hall-ah Awareness leh Screening hi an kalpui a ni.

TB chungchang inhrilhhriatna leh endikna hi Khawzawlah hian Hermon veng leh Zaingen vengah te neih a nih tawh bakah Khawzawl a zirna in thenkhat - Khawzawp Higher Secondary School, Khawzawl Senior Secondary School leh Far-East Experimental School-ah te kar kalta khan an lo kalpui tawh a, hemi hmlam hian Chawngtlai leh Tualte khuaah te pawh an lo nei tawh bawk a ni.

<><><>

POL PARTIES

ZPM vice president Pu Lalmuanpuia Punte chuan AMC inthlanpuia an chakna chu neutral-ten an thlawp vang a nih thu a sawi a,

Vawiina an party pisa a chhung inkhawm ah thusawiin AMC inthlan zawh taka ZPM-in hnehna sang tak an chan chu an party bil chakna ni lo a, neutral-ten an la thlawp vang a ni a ti a, hetiang taka neutral-ten an thlawp theihna tura chak taka hna thawktu Chief Minister leh Minister te, kawngpui tha petu leh healthcare scheme tha tak siamtuten an thawhhlawk hle, a ti a; hnehna an chan theihna atana pawimawh ber chu Pathian an lamah a tan vang a nih thu sawiin, Pathian malsawm tlakin, Pathian lamah tang zel turin ZPM party mipuite chu an khawsak dan fimkhur turin a chah.

MNF Mizo Hnam Rûna chung inkhawmah MNF President Pu Zoramthanga chuan thusawiin, Aizawl khawpuia MLA bialte chu ZPM MLA-te bial vek a nih thu a sawi a, inthlan hmasa lamah an lo chaklo fo tawh bawk nen theihtawp chhuahin engti zawng pawha tlin hrim hrim tumin an bei a, inthlan hun nasa taka pawtseiin mipui rilru hmin an tum a ti a, mipuiin MNF AMC tana sum an release duh lohte kha an hre ve bawk silo nen, MNF chuan ZPM chu an chelh thei ta lo a ni a ti.

India rama passport leh VISA ngai miah loa a rawngbawl turin Pathianin MNF chu a din leh ruat an nih thu leh Pathianin thil siam zawng zawngte hnena chanchintha hril tura a kohna chu MNF chuan an kalsan thiang lo tih sawiin Pu Zoramthanga chuan, kum 60 chuang MNF hruaitu Pathianin a hruaina chu an tan a tawh thu leh hei hi an tana hlu ber a nih thu a sawi.

BJP MLA Pu K Hrahmo chuan vawiin khan an party pisaa chung inkhawmah thu sawiin, Aizawl mipuiin ZPM sorkarah beisei an nei tawh loh avangin AMC inthlanpuiah mipuiin vote an thlâk tha peih lo hial a ti a; AMC inthlan result kha ZPM tan lawmawm angin lang mahse, Aizawl khawpuiah MLA an nei vek chung leh Minister-te an nei fur chung a solid thei lo kha a zahthlak hle, a ti.

Pu K Hrahmo chuan Pu Modi-a kaihhruai central BJP sorkar chu Mizoram mipuiten khawvel thila an mamawh chhanna a ni tih hriain, support a hun tawh tih a sawi a; state hrang hrang inthlanah BJP chuan chakna sang tak an nei leh tate hian Pu Modi-a sorkarah rinna an nghah zia a lantir zel a ni, a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

FORGERY CASE

Sorkar lehkha lem siam avanga Lunglei Police ten tun thla ni 1 zana an man, Jeremy Lalthingtura, Aizawl Zemabawk Beraw Lui a mi chu Lunglei Police ten darkar 72 chhung Court a Remand an dil anga Police ten Thanna a an kawh hnuah waviin khan darkar 72 dang kawlleh an dil a, CJM Lunglei chuan a phalsak.

Jeremy Lalthingtura hian thubuai dang neisa in Lunglei Dist. Jail Sazaikawn ah a lo tang tawh sa a, Jail-a a tan lai hian Guwahati High Court, Mizoram Bench lehkha lem hmangin a tanpui mi 17 te chhuahna turin a bum a, pawisa engemawzah pawh a dawng a, Jail atang pawhin chhuah an ni.

Mahse Court lam chuan an rinhleh avangin Police ten Jail tang chhuak te chu an zawng leh a, mi 12 man leh nghalin Jail-ah khung an ni leh tawh a, tunah hian mi 4 la man loh an awm a, la man loh pakhat erawh chu Khawzawl Police a thubuai nei niin Champhai Dist Jail-ah a tang mek a, pakhat erawh thi tawh a ni.

Lunglei Police te hian thuzawhfiah zui tur an la neih avangin Court-ah remand hi an dil leh a ni.

<><><>

VOTE COUNTING

Wawiina Assembly vote chhiarah BJP chuan West Bengal-ah a wawi khat nan sawrkar an siam dawn. Chanchin buatsaih lai thlengin seat awm zawng zawng 293 ah BJP te hian seat an lak tawh leh hma an hruaina hi seat 191 a ni a. Rorellai Trinamool Congress in seat 85 ah hmahruaiin Congress in seat 2 leh CPM in seat 1 lain seat 3 ah midangin hma an hruai a ni. Ramin zalenna a neih hnuah a wawi khat nan BJP sawrkar West Bengal ah a ding dawn a. Kum 15 chhung sawrkarna siamtu Trinamool Congress an lehthal dawn ta a ni.

<><><>

KERALAM & TN

Keralamah Congress kaihhruai United Democratic Front (UDF) te chuan kum 10 hnuah sawrkarna an siam dawn niin a lang. Seat 140 awmah Congress hian hma an hruaina leh seat an lak tawh zat hi 60 a ni a. An thawhpui IUML ten seat 23 ah hma an hruai a. Sawrkar lai CPM chuan seat 28 ah hmahruaiin Kerala Congress in seat 7 ah hma an hruai bawh a ni.

Hetihlai hian Tamil Nadu ah pawh sawrkar thar a ding dawn niin a lang a. Lemchanchiam politics-a zuanglut Vijay-a kaihhruai Tamilaga Vetri Kazhagam (TVK) te chuan party malin seat an la hnem ber a. Seat 234 awmah seat 105 ah hma an hruai tawh a. Sawrkar lai DMK ten seat 53 ah hmahruaiin seat 5 an la tawh a. AIADMK ten seat 45 ah hma an hruai bawh a. INC in seat li ah hma hruaiin seat khat an la tawh a. BJP ten seat thum ah hma an hruai bawh a ni.

<><><>

ASSAM

Assamah chuan sawrkar lai BJP ten hnehna an chang chhonzawm dawn niin alang a. Assembly seat 126 ah BJP te hian seat 59 ah hnehna an chang tawh a. An thawpui AGP ten seat 5 la tawhin BOPF ten seat 6 an la tawh a. Congress party ten seat khat la chiang tawhin seat 19 ah hma an hruai a. AIUDF leh TMC ten seat khat ve ve an la tawh bawk a.

Vawiina vote chhiar ve tho Puducherry Union Territory ah chaun NDA sawrkar a ding chhonzawm dawn niin a lang a. Seat 30 awmah All India N.R Congress hruaitu N Rangaswamy kaihhruai NDA te seat lak tawh leh hmahruaina hi 17 a tling tawh a ni.

<><><>